


校正黃存稿




漢書門類		
一〇四	一	號
一七	函	
一八	架	冊

內閣文庫		
三二	一〇四	漢書類
一八	函	
一八	架	冊

內閣文庫		
番號	漢	10411
冊數	8	( 6 )
函號	316	134

十三之五





整菴先生存藁卷之十三



淺草文庫



義

明泰和羅欽順允升父著

同郡後學郭一鶚汝薦父

全訂

同邑後學歐陽照文白父

同郡後學歐陽調律伯宣父

全校

同邑後學楊嘉祚邦隆父

真州後學陳夢暘爾旭父

編次

金陵後學沙含玉玉府父

嗣孫珽仕戾符父

墓志銘 一十四首

璇仕釋白父  
璩仕君長父重梓

中順大夫南京太常寺少卿劉公墓誌銘

正德九年夏南京太常寺少卿劉公以疾求致仕  
優詔賜允既還里居以其年十月十二日卒于正寢  
享年六十有三諸孤壽等將以某年某月某日葬公  
某里某山之原乃奉翰林庶吉士尹君襄所述行狀  
走數千里來拜余請銘余與公同官南京有年晚辱

魁

同事不可謂不知公也銘安得辭按狀公諱稱字務  
教別號拙菴系出漢長沙定王之後世家永新城北  
曾祖諱元傑贈工部右侍郎兼翰林院學士妣歐陽  
氏贈淑人祖諱髦鄉舉易魁隱居教授學者稱為石  
潭先生封翰林院編修贈官如曾祖妣楊氏贈淑人  
留氏封太淑人考諱定之累官禮部左侍郎兼翰林  
院學士入內閣典機務卒贈禮部尚書謚文安妣賀  
氏張氏贈封俱淑人公賀淑人所生文安第三子也  
成化壬辰以任子授中書舍人滿九載陞大理寺副

過

仍掌中書事。又四年陞南京尚寶司丞。丁張淑人憂去位。服除陞尚寶卿。又八年遭賊瑾盜權變亂。任子成法或相先以賂得免。公誼不肯。遂罷歸。逾年賊瑾誅死。乃還。公前官滿考。遂有太常之擢。授階中順大夫。比其致仕。僅亦踰年。爾公祖父皆名重天下。而公天資純樸。守其家訓。惟謹。歷官四十餘年。寅畏小心。未嘗有過。其家居。每夙興。輒詣祠堂焚香展拜。已則就省。張淑人安否。遇有疾。必躬侍湯藥。不離左右。及其卒也。執喪甚哀。而禮亦稱之。接人謙厚。質直不

索

為矯飾。其言若不出口。至論先朝典故。古今人物出處。則屑飛繩貫。終日無倦。公退常博覽載籍。吟詩合律。作字雖倉卒。無一筆苟。士夫之論。皆以為能世其家。云配廬陵胡氏。封宜人。內助有方。閨門整肅。子男四。長壽。國子生。次福。富尚。女四。嫁賀柄。賀家蕭應寵。蕭湘。孫男七。女四。凡狀所述。與余所以知公者皆同。余為之銘。宜也。銘曰。石潭之孫。文安之子。祖父高明。難乎其似。似之惟有。有行有文。家聲載延。有馥其芬。優游兩京。位登四品。

逾六首丘知幾則敏惟終之令于始彌光遺墓有付亦曰肯堂

南京戶科給事中劉君墓誌銘

君姓劉氏諱紘字景瞻吉之安福人漢長沙定王子安成侯蒼之裔其先居湯村君高祖敦復始徙今葛洲再世得忠愍公球以大節聞天下而族姓益顯及君為給事中於南京戶科從子兵科給事中持美淮安知府持慶又同時起聲烈蓋其盛如此君既居言路與諸同官一心多所建明如論竇給事不宜深罪

持竟

章竇君具草尤有瀾繫又往往獨言戶科事言皆溫厚而平正可據以行正德壬申六月忽被錦衣逮先時君以職事入朝道淮陰有巨璫驟至持慶方侍君語未暇省璫璫怒即騰章誣詆持慶并中君獄成待慶坐免君得白還任然已因暑致疾醫療久之意不起癸酉正月二十一日也得年終三十有六人事之變固有屈有伸而長逝者已矣嗚呼是豈獨劉氏之不幸哉君自幼開明遇先生長者談名理及古豪傑事輒拱立注聽長益深造遂以春秋擅名邑庠弘治

甲子領鄉薦明年登進士授江陰知縣時海寇擾鄰境獮甚民洶洶君至首料丁壯為備備甚設卒保無虞堂左右立二厨分收案牒日以次發視決遣而謹其局鑰定擬賦役覆視必再三出是吏絕姦欺刑清政平民小大無不服者時詣學視諸生業且問興革所宜一日諸生以修學請乃從容風曉俾歸各謀于父兄居無何相次以名來上計楹授任聿底完美少師石齋楊先生喜而記之逆瑾勢方張郡縣率以賄為悅苛政亟行君若罔聞知顧民間有隱田久逋輸

入  
稍稍摘取之以彌縫歲計而已前令涂頌旣人臺忤逆瑾以死士民悲思不置君立主于名宦祠祀之或危其舉一不顧愛民惜費至輟堂食錢以益賑卹受獎勞取具公帑甚廉蓋為江陰四年而擢戶科又踰兩年而卒君性質端重寡言笑喜揚人善人或道機穽事輒頻蹙不欲聞祀先延賓務致豐潔其於自奉泊如也曾祖伯文以忠愍貴贈禮部主事祖珪父釗以君貴贈南京戶科給事中母王氏贈孺人配謝氏封孺人子男二福祿女二君之卒也六科同官與吏

部兩歐陽郎中實經理其喪事司勳復為狀以禱來  
謁余銘將歸葬其邑之原嗚呼余何忍銘君也伴來  
告曰以己未發引不得已勉為之銘葬在某年某月  
某日銘曰  
白而長身有蔚其文朝綰銅章治聲夕聞乃陟黃門  
當幾必果靡遺弗拾靡獻非可追榮所自式被恩  
私焚黃墓道指日為期病不及瓜沒有遺憾昭示方  
來美銘非濫

南京刑部郎中周德孚墓誌銘

司  
正德丁卯冬德孚以甲子舉人來南雍卒業余時方  
為可業一見偉之進而與之言知其所蘊有過人者  
輒以遠大相勵明年春德孚遂中二甲進士擢知邳  
州其為政有條甚得民和俄劇賊剽六等跳梁四出  
德孚亟料丁壯增埤浚隍具器械積芻粟為備一旦  
賊果驟至卽躬率士卒登城抗禦晝夜巡督不暫休  
衆感其誠益相與用命賊連失利遂解去城卒完民  
小大驩呼曰周侯實再生我相與立生祠祀之余時  
卧病淮陰淮人多為余道其事莫不壯其節也壬申

冬德孚進南京刑部員外郎蒞山東司其治獄善求  
情嚴而不刻長貳亟加獎予同官有不合者嘗挾私  
誣奏以事久之事竟白時理其事者頗持深文使德  
孚毫髮可疑當不但已余方佐南銓知之特詳丁丑  
秋余奉表人賀聖壽德孚以考績聯舟北行旦夕  
晤語益款戊寅陞郎中其冬丁繼母柴氏憂解官南  
歸踰年又哭其父以哀毀致疾醫藥罔效後其父之  
卒七月竟不起庚辰三月二十三日也余時移疾  
家居聞訃大驚為之嗟悼累日豈意德孚遂止此邪

蓋得年四十有五而已德孚天性孝友母早卒事兩  
繼母皆無少違忤有弟三人出繼母李俱幼而失恃  
柴繼至遇之殊少恩德孚恒惻于心撫視周至服食  
寢處以至從師受室百需一切以身任之父嘗貸重  
貲狹以出遊既乃垂橐而返卽竭力以償所貸生事  
日窘養大父及父母未嘗有失節家庭之內謏讚或  
行諸弟往往被譴德孚輒起敬起孝婉辭柔色委曲  
開譬必致感悟而後已論者尤以為難平居端重有  
威言不妄發自奉約而豐於賓友待宗族鄉黨各當



其分一飯之德終身不忘處官處家條理皆極精密  
其可稱者亦多矣惜哉周世居泰和羅江里遠有端  
緒德字也諱尚化曾祖諱崇高祖諱希茂皆不仕  
父諱廷從封南京刑部員外郎母李氏贈宜人配同  
邑路邊蕭氏封宜人柔順貞則男子三人循典循法  
循理理邑庠生男孫幾人德字貴而能貧其卒也至  
無以庇其妻子蓋久而不克葬諸子經營累年始謀  
以嘉靖乙酉某月某日奉葬某里某山之原豫來拜  
余請書其墓中之石余於德字有不能忘情者乃據

平昔所知叅以其友郭正學所述事狀為之誌且銘  
之銘曰

有質如山有文如泉有政惟蠲企高鑽堅行義昭宣  
世所稱賢而不永年嗚呼莫之為而為者天也

封承德郎禮部主事前建寧推官孫公墓誌銘

公諱序字尚禮姓孫氏其先濠梁人六世祖仁從  
高皇帝起兵始家于滁其長子聚充有武功世官正  
千戶次子慶是為公高祖慶生會會生和皆以善人  
長者稱和生允恭卒官贛州教授教授生公公有子

反

七人其第三子存登進士第今為贛州知府比三世以文學顯於是孫氏蔚為滁之名宗教授公經術通明由鄉舉歷教嘉魚贛州兩學諸生多所成就如都御史李公田御史孔公儒尚書董公越其表表者公早承家學成化癸卯繼舉于鄉六上春官不第弘治辛酉始擢建寧府推官至官創作理刑廳日勤事事獄無小大務底於平而亦無久淹者建俗貫服毒草以死誣人公得其情率友坐其謀主俗以衰息有殺人而泯其迹者更不能得至枉坐平人當道檄公與

具伏

温州郡官雜治之公默禱於神得異夢焉且閱諸囚有張烏眼者後其眾以扶公命前之曰殺人者汝也其人惶駭其服出其殺人之具于河而枉者遂白濁浙間相與驚異以為神白水洞盜起官軍往擊之厲公督餉餉道多灘險苦難繼公令以苧布為囊其米遇險輒負以之夷竟事平餉以無乏他如督逋賦輯礦徒皆有成勞可紀然性素剛直時為守者所為多不法公常顯諫陰諷冀其能改乃竟為所中傷罷而歸歸則益留心於教子動以義方不徒文藝存初

仕為禮部儀制司主事三載考最獲封公以其官階  
所得 命詞甚寵公每寓書京邸必勉其盡職且令  
兼習刑名曰此用世所須民命所關也晚得雙泉於  
醉翁亭西乃作亭泉上品其風物釐為八景因自號  
雙泉居士又營壽藏於城北之龍蟠岡名曰安樂窩  
時時攜客往遊登臨觴詠樂之不厭也存既領郡持  
吳白樓先生文歸以壽公賓筵無虛日已而從公游  
於窩上公飲酒甚歡因論之曰汝觀我我壽殊未艾  
也而有君命何可久泥於私翼日遂親送之登舟而

誨勵加切州舉鄉飲欲得公為大賓以公前此屢辭  
乃具輿從踵門固請公時年已八十至則進止拜興  
皆中節度邦人士益高仰之無何喪其長子因感傷  
致疾醫療踰月竟不起嘉靖甲申七月十七日也其  
生正統乙丑十一月二十九日原配李氏 伊府長  
史傑之女贈安人繼黎氏滁州衛指揮全之女封安  
人七子者長孝 益府典膳次攷義官次則知府存  
次季次孟州學生次厚次孚女四人長適吳知府璋  
之子鶴次天次適舉人李德霖次適郭奉祀之子原

孝攸及吳氏女李出孟厚及李氏女黎出存李及郭  
氏女少室寶妣李出孚馬出孫男九宗之守之憲之  
密之寅之實之賓之宜之官之女五長適鄒金餘在  
室曾孫男一世美存聞訃哀毀先以書來致其寮伍  
戴守佐所為狀道其乞銘之意而匍匐隨之初余偕  
計道滌獲與公晤遂辱交焉于今三十餘年矣存仕  
學兼優顯揚斯在顧自以為子職多曠幸得銘以葬  
庶以少追其罪戾云者余讀其書聽其言悲其志而  
慨公之不作也銘其忍辭葬以某年某月某日地則

安樂窩是已銘曰

侃侃孫公亶惟自信有懾其嚴有祗其正彼哉何物  
我嫉我仇豈無泉石畢我優游抱弗盡施施弘于子  
寵命煌煌其來未已公歸矣適安樂之窩堅珉有刻  
終古不磨

廣西太平府知府王公墓誌銘

知廣西太平府王公以職事八朝道經故鄉疾驟  
作留治數日竟不起正德二年十月八日也享年六  
十有三諸孤恭等卜以次年十一月己亥葬公雲亭

鄉小溪茶頭山之原先期具公事狀拜余請銘余游  
公父子間不為非知公者顧德薄名顯有言不信其  
何能承公之存用此固辭而其請益力曰葬先公而  
不得先生銘猶弗葬也恭兄弟何所逃罪茲大事也  
敢二三乎余感其意勤乃為執筆公諱休字去矜姓  
王氏王氏自晉太傅導始盛於江南其後有宗文者  
嘗刺吉州因家于吉至宋戶部侍郎贄又徙居泰和  
故公世為泰和人國初有以文學徵為諸王說書  
學者稱竹亭先生公之高祖也曾祖字伯貞官至瓊

州知府有惠政民祠之至今祖諱直累官少傅兼太  
子大師吏部尚書贈太保謚文端父諱植好學篤行  
楊文貞公嘗說玉以與之以公貴封中書舍人加贈  
南京後軍都督府經歷文端諸孫凡十數皆名能守  
家法而公最良年二十四以文端遺恩授中書舍人  
歷陞南京光祿署正後軍都督經歷凡三仕率九年  
勤慎周詳未嘗有過弘治甲子始擢知太平太平地  
接蠻荒法禁積弛強猶弱鼠習謂固然公至首鋤厲  
民者數家配盜鑄之魁一人戮妖師一人豪姦屏息

羣情大慰乙丑歲歉以官粟貸民約令輸息十一民以不餒息既入併他所通融分儲府之三坊為廩者九乃定為義廩法將隨歉隨貸不復取息期於久行大新學官增補弟子員時臨視其勤惰讀書令自小學始又取古冠昏禮俾其講說推行游宦死太平者積數喪貧不能歸皆為資遣之俾歸葬行旅入境死喪疾病處之各有條其施設規模類非俗吏所及也公器局修整惇行孝弟母宜人歐陽氏早世每與及輒泫然事伯兄能敬以和声色之娛絕于耳目博學

### 察

多識兼工詞翰而不以自名接人甚恭雖童幼必與為禮識時知變然不苟為同在中書時鄉人李致省以左道幸朝士多出入其門公迄無一跡其遷光祿蓋當國者嘆公持論高語嘗侵已故以抑公公不為悔也督府卒有獲罪於其母者法司當以大辟公察知無大故呼其母諭以天性之真母大感悟泣下詣法司自實獄竟罷後為母子如初母病且死囑其家人世世無忘王公德公仕中外垂四十年其忠厚之存隨事及人多矣而得行其志之日淺故於建事立

遺

功有遺力焉然考論其平生大節則世之知公者未  
有不以公為君子者也初娶楊氏文貞公孫女早卒  
贈宜人繼任氏長樂知縣衡之女封宜人五男子愈  
恭愚思愆愈乙卯舉人恭邑庠生思辛酉舉人文行  
皆有稱而愈先卒二女子大司成羅公之子鏗建德  
司訓劉先生之子廷儒其壻也孫男二女四公訓諸  
子恒曰學以言行為要謹言正行必始于家庭于祿  
非其先也嗚呼公其有見哉銘曰  
儀維德隅恭維德基道豈遠而文端我師望之顛顛

卽之雍雍亶其疏通為邦有庸弗違者夫世欽厥傳  
歸寧斯阡於千萬年

成都府同知致仕李君墓誌銘

成都府同知李君致仕家居者七年年五十八正德  
丁丑五月十一日以疾卒余其同年進士也聞訃則  
走哭于其家弔其寡孤問其喪具而退既踰月其孤  
翼等奉監察御史李君師文狀來請葬銘余不文念  
於君之葬也無能為助遂勉從其請君諱儀字公著  
別號虛息其先鎮江丹徒人曾祖福洪武初徙實京

徙

師始占上元籍祖惟善父元昭皆有隱德君自幼穎  
敏彊學善記弱冠從故方伯吳秋堂受易為門下多  
士稱首弘治士子以應天學生領鄉薦明年會試中  
式廷對賜同進士出身歷知江西之新昌山東  
之冠同知四川成都府中遭家艱者再居官前後不  
能以十載而皆有名初至新昌值寇賊羣行即躬練  
兵民為備民驚徙者皆招使復業聲張實副卒能上  
下相保真橫民盧希淵於法及其諸子境內震服臨  
江王張二姓格鬪王殺張一子懼罪乃殺丐者三人

稱為已子以誣張累訊不得其情後乃屬君君問死  
者皆有婦邪各以婦氏對徐檢視黃冊驗諸死者及  
婦名氏張具有之王一無有也於是刑王婦婦即吐  
實曰受顧來爾事乃白冠俗死者多從火化君求不  
食之地為漏澤園以與民葬埋俗由是變勸學禮士  
補助貧乏士民皆歸心焉其為同知嘗攝守重慶時  
劇賊某者率其黨蔽江而下人情洶洶君百方備禦  
江兩岸皆置疑兵旗幟鮮明金鼓之聲相厲盜相顧  
巨測竟替遁天全六番二招討以茶利相讎殺往來



道阻播州當嗣宣慰者與其庶兄不相能日尋干戈  
駭動四隣監司皆檄君廉問至則一引大義責之且  
婉為開導遂皆感悟頓首謝不辭願受約束還報監  
司皆迎勞以禮然君素羸弱頻涉危險勞瘁甚病且  
作遂以致仕請堅請而後得之家居清約無異寒士  
而綜理詳密雅好吟咏有虛息稿若干卷藏于家配  
王氏子男四長鰲先卒次卽鰲次鱗習舉子業次魴  
女三長適王知州子儒次適倪主事子霆次適張布  
政子志孫男二祖費祖繩女二君於義利能知所取

舍既終母喪父又疾篤兄子求分異卽請悉以家產  
與之播州贈累千金見卽辭去此皆有足稱者葬以  
某年某月某日墓在某縣某里某山之原銘曰  
學優乃仕光于累試為柔為剛應變不常宜仕而止  
式全其美居逸而勤以詒厥孫其存孔厚而留於壽  
沒也不亡眎此銘章

李先生墓誌銘

先生姓李氏諱穆字元載吉之泰和人泰和自國  
初以來號稱多士其尤顯者文學勛業往往追配古

自  
人或乃顛躓於時負其才終不獲展而深培厚積以  
大放厥辭者亦多卓然有可稱述先生其一人也先  
生方幼學屬對已有奇詔長而益務博覽性復強記  
迴出其輩流賦詩作文不拘一體宏肆簡嚴各極其  
趣裁剪之妙幾於台然於敘事尤長有條而不紊蓋  
平生所作名寄寄集者凡八十卷所修郡邑志處別  
為部又數百卷嗚呼可謂富矣其才如此而其用弗  
究豈非其命哉先生年三十有四始以虎賁左衛軍  
餘中應天府鄉舉明年得官南樂訓導將滿考會其

令以官地私媚貴人先生不義其舉發其事被逮至  
京竟坐兩罷後雖申辯得直第令以冠帶家居士大  
夫聞知交致書幣以講學著書為請由是蹤跡多在  
荆楚間因以寄寄為號所至或數月或一二年留滯  
久之而先生老矣既倦遊而返則與諸故舊為真率  
會閤老澄江公尤重之每見必酌酒賦詩奕棋相笑  
謔以為樂如是者又十餘年年八十有三正德戊辰  
八月八日以疾卒其始終之際如此先生為人坦亮  
和厚事親孝待諸弟姪有恩凡授徒所得束修皆持

歸以為親養。晚年喪母，諸弟請具適有潤筆金數十，即以授之。介弟元平以翰檢還官，廣東過家，病卒，舍卒無以為斂，即斂以已所備棺於親戚交游，禮意無不周洽。一飯之德，終身不忘，必報之乃已。而尤善施德於人。在南樂有竺簿者，嘗被誣為言於所知，得釋竺致五十金為壽。先生曰：吾所為言義也，奚以利為竟不受。嘗客武昌，見民冬月渡金沙江，多溺死者，亟以啓事曰：于當道乃倡為橋以濟，後因為浮橋為利。至今其教人有方，多所成就，如曲沃二耿攸縣二戚。

尤知名所作真行篆隸諸書，學者亦爭藏去，以為法。蓋其性行與其及人者又如此。曾祖文佐，祖克禮，太保王文湍，公為銘其墓。父諱玉璧，博學工吟咏，有詩集若干卷，藏于家。母劉氏，以元平貴，贈父翰林檢討。母孺人配蕭氏，先卒。子男四，長仁繁，昌訓導。次侑，仕信，侑信皆為儒，仕為郡掾。女二，長適上模曾扞，次適雲南按察僉事曾頭孫男九，長潮，鄖陽學生。次鴻，潛漢，沔，溫，滌，滌，洲，女四，長適藍田蕭傑，次適濠下嚴綬。餘在室曾孫男二，曾音先生初葬，其配于五十六都。

佛獅印西南為雙壠而虛其左疾亟遺言諸子善自立且令合葬無違卒踰年諸孤始得葬日於十有二月某日伯先事來請銘先生欽順父執蓋嘗獲侍教焉茲其敢辭不敏乃據先生所自書年譜及仁侑所補述事狀敘次如右而為之銘銘曰  
齊景千駟伯夷首陽同歸于盡芳孰遠揚兒童所羨金朱煌煌孰云不朽德業文章嗚呼先生才高志剛栖栖一世抑又何傷遺文百卷其存者長

義官蕭公墓誌銘

瀘

公諱城字景卿別號退逸姓蕭氏其先自瀘源轉徙社坪再遷今泰和城西之茆園凡若干世矣曾祖仲齡祖貫之父元獻貫之為溧水知縣有能名其世父伯齡以進士卒官寧波同知伯兄薦之亦以進士知高要而卒仲凡引之以子少司空彞貴封左通政蓋百十年間領科名登仕版者相踵家門之盛卿邑推之公生而資稟端厚初就外傳日記數十百言長益深造大為少司空所器許甫弱冠遂喪其父俄又喪其伯父大父母垂老諸弟多未成人而公私百務日

滋出公於送死事生養老慈幼應門幹蠱一切盡心力為之且惓惓督諸弟子學俾無忝厥世處宗邨以和以度未嘗有疾言傲色見先生長者為禮必恭其交接之周雖童孺亦無所忽諸父仕既顯聲勢烜赫公當其時方精為諸子擇師程督之嚴無間晨夕稍暇則課僮奴力耕稼外此無他慕者雅好賓客客至為具必腆家有餘積往往推以及人弘治中嘗入粟助公家賑饑例錫冠帶公儀觀瑰瑋設施優裕既拜錫鄉人命以克稱其服為公榮之比及晚年顧諸子

若孫職業之修皆可觀因以退逸自號其志亦可見矣正德己卯二月二十日以疾終子正寢距生正統己巳六月四日享年七十有一配曾氏多內助子男四序廩廉廣廩廣嘗例授淮府典膳孫男十一仁傑儼仰侃修偕仲倫佺僅仁儼俱邑庠生女三其壻贛庠生曾應鳳西原羅光鳳余次子邑庠生珣曾孫男五朝鳳朝賓朝用朝魁朝宗女三諸孤卜以卒之年十月辛未葬公雲亭鄉下規之原先期奉平樂戴守段先生所述事狀來以墓銘見屬余於公伯子舊

有斯文契晚獲與其季連姻因以知公之平生頃余  
還任南都公攜酒斂追送千餘里盡懽而別其時方  
盛暑而公俯仰酬酢竟別無倦容且飲啗皆勝孰意  
其遽止此也然其始終之際如此可不謂之福人已  
乎是宜銘銘曰

世累簪纓於赫家聲舍醇以生昌辰是丁不競不偃  
識慮惟精以篤于成以永其盈曾不百齡大命俄傾  
地有留耕允穆鄉評蘭玉交榮身後之禎尚覩茲瑩  
俾表崢嶸

旌義冠帶介軒劉君墓誌銘

君諱述倫介軒其號姓劉氏嘗奉入粟例受冠帶之  
旌先世本汴人宋之季有功甫者來丞萬安因留家  
邑城之西其後裔日蕃且多才傑入國朝尤盛仕  
而名位有聞于天下者若故刑部尚書克平湖廣左  
布政使述憲河南左布政使咸卓今南京都御史咸  
粟父子兄弟踵相繼也隱而名號有稱于鄉邑者則  
君其一人焉君曾祖正年祖德英父廣宣正年仕元  
為瑞金丞與贈刑書昭年公為再從兄弟皆功甫之

諭

曾孫也君生五歲而孤有兄述彞僅十歲母孺人鄒氏年甫三十守志不貳以撫二子其伯妣周亦早寡有子述傳相與同志同居後十餘年而述彞又卒家事日就衰落君夙夜圖惟自振罔敢懈督視耕作生殖貨財為之皆有方積累久之益恢于舊貫乃與述傳協謀作堂以事二母堂成其伯父浦城教諭有臨以雙節名之廣東布政使周公鐸為之記一時人士得於見聞者皆相與稱頌二母之志有成而二子者為能無負也有司察知其實將奏請旌門之典鄒孺

人俄以疾卒例不得與獨周被旌君既早孤事孺人尤謹孺人性嚴急每婉曲承順務得其歡心及謀葬孺人既得善地因奉移其先君之柩來合其謹於送終又如此顧以旌典弗逮每一念及輒慙慙不自釋云君性剛直而厚於倫紀言動詳審取予分明族有公使錢籍在祠堂君計所儲未足以周於用請得而蕃息之此其入也倍焉族老長良喜命子弟勞之以禮君再三辭謝曰此分內事爾何勞為衆益賢之房孫鑾卿嘗舉家病疫死亡相枕親戚無敢入其門者

君亟以鑾御歸祝家人善視之審其藥食而時時進之旬日疾良愈留不即遣旦夕撫教與諸子均踰年乃聽其歸立門戶鄉人有曾華山者典司縣庫嘗寓食君所食畢忘所挾官錢而去君見而收之有頃號而來曰食客多矣將誰詰身家之禍今至矣君迎謂之曰無患輟而泣吾以歸汝出其原封授之華山驚喜泣拜曰公活我公活我遠近傳聞益用高君之義曰斯其所以為介乎平生與物無爭非公事未嘗涉迹公府諸子皆教之學其季尤穎敏則遣充邑庠生

元  
學行之端信於朋友君享年六十有七正德丙子十  
二月初八日以疾終于正寢臨終精明不亂諸子環  
侍囑以孝友勤儉無忝我又顧其季子若婦言曰汝  
尚無子宜審為圖言畢命取酒正坐三醕恬然而逝  
配蕭氏出同邑南門舊族賢明善內助子男四斐彥  
能宏宏余子壻也斐早卒女一適泰和庠生曾用孫  
男四軫卿畿卿克卿克卿女二君卒後數月宏以母  
命來南京拜余請葬銘問其期知未卜也余因與論  
古禮及鄉俗之弊曰茲事何可緩汝歸與諸兄其速



圖之銘吾宜為審日月有期不汝誤也及是乃來告  
曰將以庚辰之歲某月某日葬先君於邑東田心里  
塘下山之原石已具敢請乃按宏自為狀及求得其  
族譜詳考其世次為之論著如右而銘之銘曰  
遐思以恣恣式亭厥也無曰亭只孝之篤義之遵慈  
弘于教以垂永世之仁其蕃其大其有弗洵

上舍生郭君廷祥合葬墓誌銘

君諱麟字廷祥別號介軒姓郭氏其先自吉水白沙  
徙贛之烏溪十二傳至朝玉甫自烏溪徙信豐龍洲

君高祖也曾祖諱子恭祖諱彥英以輸粟被徵為義  
民又徙安遠之陽寨考諱紹經母堯氏君自幼穎敏  
選充信豐邑庠生從明師受尚書長而學識益進提  
學試入優等俾膳於廩人屢試秋闈不利貢禮部卒  
業南雍無何喟然嘆曰吾親既不逮養吾何為於此  
遂謝病歸家居二十餘年介然自守邑大夫皆高其  
行每御飲恒以賓介處之名聞於少叅俞公會舉雙  
橋之役訪以兵事所言多見采納維時陽寨亦多警  
乃移家信豐之水東聲實蔚充水東稱巨擘矣正德

待  
壬申十一月十一日以疾卒其生正統乙丑八月二十三日享年六十有八君天性孝友初遊邑庠去親舍稍遠晨夕自講堂退輒南望歔歔得一佳味即馳獻其親度未嘗不敢輒食二親沒居喪如禮遇諱日必齋宿將事以為常兄弟七人其四異出相與雍睦無間而事其伯兄惟謹行兄弟之子皆有恩有遭誣在理者罪且不測亟捐百金以營救之事卒解待親友情極款曲而言論侃侃不苟為同允喜獎掖後進持身嚴整衣履雖敝不甚垢飲酒至微醺即止厭俗

尚奢靡一以儉約矯之教行閭門出入以度無敢求服美者食指雖眾每時其寒飢而溫飽之緇黃之流庭無一跡其租入歲贏萬斛里中貧乏賴之以濟者不可勝數所焚逋券前後以數百計人多德之有士人持券投君求濟其父喪君盡然輒遺之數金而歸其券優遇庄客果不給即貸其粗惰者必撻以示儆由是人人思奮多有成富家者矣配胡氏出安遠名族時濬翁之女孝敬溫柔宜于上下性勤甚杼柚無虛日凡事一惟君命而彌縫之力為多以正統壬戌

鏐

十月望日生卒正德甲戌二月既望享年七十有三  
子男一守謨女一適瓊州王太守從子巽孫男五鐸  
鏐鏐鈇鏐鐸鏐鈇俱安遠學廩膳生鏐鍛俱信豐附  
學生曾孫男五日昌日宣日乾日贊日習女五守謨  
及王氏女鏐孫鍛孫皆後君卒家仍多故君之葬是  
以緩也始君特奇愛諸孫教之甚篤晚得余從弟欽  
藹以為之即遂委心託之迄今二十餘年余弟猶主  
于其塾而諸孫者學皆有成此可見君詒謀之遠諸  
孫亦無負君之教矣嘉靖己丑鐸等始得吉地於信

師

豐安息里下堡寨前並營二壙向卜是冬十二月乙  
酉奉柩歸藏前期因其師來請余銘君之賢余聞之  
余弟稔矣乃按其鄉友瓊倅俞君淵所述事狀參以  
所聞敘而銘之而不辭銘曰  
學匪徒文惟行之端理優于家政弗以官婉茲內相  
媿德無愆以明以昌人也非天紹聞嗣服諸孫則賢  
有行其流莫深匪泉寨前之阜厥壤燥堅雙壁偕藏  
我銘是鐫

封淑人羅氏墓誌銘

故工部右侍郎栢菴張公之配封淑人羅氏年七十有八以疾卒正德癸酉六月四日其子鎮將請命于朝合葬公墓先期屬其再從兄宿遷司訓鑰為狀拜授使者來南都徵余銘欽順早辱公知既乃通好於淑人德善得於耳目者非一日矣惟不文是愧銘其敢辭張羅皆泰和西郭故家門閥屹相望淑人為薊州同知孟旭之女夙閑姆教動止有常則年十八歸公時公父贈光祿卿華軒先生母贈淑人吳氏俱在堂淑人承事惟謹吳愛之愈於諸婦公自家居績

學至取科第登官兩京榮名宦業為世所仰警戒相成之益淑人是多有之嘗從公呂梁直歲凶飢民載道公悉力賑濟淑人則親烹糜于內日出以食旁近飢者累百千人其用心如此後公以內艱服闋起淑人即留主家政園田邸第歲有增加人謂公官久宜然而不知淑人自奉甚薄凡事可省即省於中外賢子弟待之尤厚間有失怙恃者鞠之長而授之室故莫不為之盡心遇臧獲有恩而指使必當故莫不為之盡力用能以其家大非偶然也及再從公京師每

時節朝賀 三宮有所賜予歸必具香案載拜而奉  
藏之已而公以疾終諸子姪皆不在侍淑人治喪一  
如禮既請得 卹典又得葬銘於名公遂扶柩以歸  
葬焉年益高治家益不倦出入以度內外斬斬此疾  
革遺言毋以金帛殮我葬毋隨薄俗妄費其善教諸  
孫務底于成言訖更衣正坐而逝子男二長鑪早卒  
無子其妻蕭氏寡居十餘年而終以節稱次卽鑪用  
公蔭補國子生久當得官以淑人老不忍去左右其  
妻羅氏故國子祭酒冰玉先生之女賢孝宜其家女

一適象山知縣蕭異孫男五循律衛術衍女二長歸  
余次子珮次許嫁王翥淑人德容莊肅言簡而善盡  
事理尤知所取予陰德亦多初被 勅命封安人後  
進宜人以至今封又兩被 誥命尊榮康豫壽考令  
終其福可謂備矣是宜銘銘曰  
從夫而貴豈曰無人勤家以大或匪思存彼昧弗思  
其祥可考賤此賢明子孫是保惟勤惟儉惟德之光  
惟柔惟順而動也剛 恩命屢申號登三品在笥之  
珍亦有宮錦生涯奄盡五福斯成載履 卹典合葬

惟寧

太恭人李氏墓誌銘

太恭人李氏諱淑賢出蛟川儒家為安福令恭之子  
歸鄣之楊為安福司訓贈刑部主事南里公之婦山  
東提學憲副崧畦先生之妻今南京儀制郎中叔通  
之母先以崧畦初仕最封安人後以叔通初仕遇  
國慶覃恩加封太恭人正德壬申叔通因考績過家  
得躬捧命書展讀成禮踰年以疾卒癸酉十一月  
十九日也享年七十有七太恭人生而貞靜其父尤

所鍾愛為審相攸一日與司訓會學宮見崧畦大加  
稱賞遂字焉及期來歸時祖舅靖菴壽官祖姑張方  
以勤儉治家禮法甚嚴其姑封太安人陳實繼贈安  
人金金慧而賢陳頗重滯弗當祖舅姑意太恭人委  
曲承事務求得其懽心凡縫紉汚泥飲食賓祀百需  
一以身任之動皆整辦陳由是得安其所終陳之世  
執婦禮無怠媼族莫不賢之崧畦雅志功名太恭人  
內助有方不使家事分其心文學益大進遂發解泐  
省魁禮闈累官至副外臺官業焯著諸子始知學太

者

恭人卽嚴督之期必紹芳祖父由是叔通亦魁鄉舉  
第進士以至今官其處娣姒諸姑間和易寡言御羣  
下不嚴而肅平居由謹婦戒非至親無得見著崇尚  
儉素絕不信浮屠言執祖舅姑及姑喪皆盡哀及崧  
畦卒于官痛毀幾絕叔通適來省亟令扶柩以歸藩  
臬諸公以崧畦守官廉諭所屬裒得千金為賻叔通  
義不受具以白太恭人太恭人日兒言是也汝父固  
以清白遺汝兄弟吾何取於此邪竟辭之子男二人  
長叔連以輸粟拜承事郎娶張氏福清丞張君之女

計

次卽叔通學行爲士林所重娶張氏開令鏞之女女  
三人長適確山令吳照次適士人金鏞次適郡庠生  
盧俸孫男三人充耘充耜皆習舉子業充耕尚幼女  
一人適郡庠生王楷叔通聞計將奔歸謀葬于其兄  
謂銘當首圖以余雅相知厚乃手述事狀介其僚友  
夏惇夫劉士鳳來請誼有不容辭者遂按狀序而銘  
之狀無一語及辭金然士夫習傳其事崧畦雖沒而  
道益行於妻子其可不書書之豈徒昭示其後人且  
將以愧夫世之貪冒無耻者太恭人之葬當合崧畦

之兆在其邑桃源鄉白馬塘窆以明年十月十七日  
銘曰

宣尼贊易坤以順承有齊士女不習而能輔成君子  
龍變雲蒸惟坤主利而以義勝義方之教亦既有徵  
休命申錫奚啻百朋其終也令惟德之恒堂封永合  
來拜繩繩

太安人劉氏墓志銘

太安人劉氏爲封南京刑部主事蕭君廷美之配郎  
中世賢之母也正德庚午遇國慶單恩勅封今

號乙亥閏四月十四日卒于南京官舍其生景泰癸  
酉正月二十九日享年六十有三郎中將奉柩歸葬  
于鄉以其同官周德孚所述行狀來拜余乞銘余家  
與蕭劉皆有連郎中於余相往還尤密誼有不得辭  
云按狀安人諱錦娘出吾邑西平士族祖諱某父諱  
某安人生長富家既歸封君朝夕承事乃若素嘗艱  
苦者事舅姑惟謹遇有疾湯藥必循用節度及其卒  
也佐封君治喪哀且慎鄉人以孝稱之初其舅筠軒  
翁尚義輕財晚年家無餘蓄封君遂容遊江淮以取



祁

給已而占籍桐城家事一付之安人安人悉力經紀公私酬應斟酌適宜殊不見窘束之態尤盡心教子延明師購書史具膏燭至晚簪珥以給其費而時時督勵之郎中學垂成乃遣就封君於桐城益加磋磨俄以庠生中應天鄉試第七連登進士第擢累令官士夫皆知其有父母之教也安人性勤儉慈恕而明達和寒暑雨不廢女工郎中屢迎養官中衣食之奉隨時稍加安人輒不憚曰汝今守官清慎吾自樂矣安用勉強為此乎訓諸婦多溫言而規範甚整臧獲

女

有過亦誨諭從容調恤族媼惟力所及遇外侮能傳片言折之婚媾間有武斷卿曲者歲時謁見皆拒而弗納其族父雲表一時之高士嘗稱諸里族以安人為有女中男子之風云子男三長郎郎中世賢文學治才士林推重次世瑞次世立安二長適萬安曾藻次幼在室世立與在室女皆庶出也孫男三午介聿女七俱幼前卒三日世瑞自桐城來省安人良喜御酒食談笑至夜明日郎中省間如平時乃入部俄報安人驟得風眩疾倉皇馳歸聚醫滿堂皆束手無措

凡三日而逝嗚呼其命也夫葬以其年某月某日墓在某里某山之原銘曰

君子生生于千里外內事之修非賢曷賴賓禮先覺以為子師教成于內名乃外馳爰登甲科官資屢進祿養恩封式鳩厥慶迪勤訓儉終始不渝承以守官清譽孔都何德之豐而壽之嗇沒也不亡眎茲銘刻

太夫人孔氏墓志銘

太夫人孔氏系出闕里 宜聖五十八世孫故湖廣

左方伯安菴劉公之繼室也祖諱父諱練伯闕里支派實繁惟練伯公一门媼姪為盛其女之壻多名御賢大夫而弘泰弘緒二衍聖公又皆其甥之所出大抵皆德選也劉世為萬安宦族公父官至大司冠受知英廟有重名而公克世其業以頭方為御史喪其配歐陽氏聞太夫人之賢以禮聘焉既歸公執婦道惟謹後公遷副閩憲擢長湖憲進左右方伯太夫人隨宦南北實多內助公得以盡心所職宦業日熙始康夫人耄壽家居間從公歸省朝夕上食恭甚

侍  
光恐先  
之誤

康夫人卒贊公裏事無違禮待諸子女恩意惟均所  
生二男子二女子公卒時俱未成立既而婚嫁皆以  
時舉其生事為之經理尤悉家亦裕如貌莊性嚴人  
莫敢犯然施諸媼族疏數隆殺必有恒儀度泰然迥  
出儔類望而知其為貴也初以公貴封孺人後以  
子貴進封太夫人晚年處人更和而治生之勤終  
始如一忘其身之老云子男四長玉累官刑部左待  
郎以議獄忤旨間任次奎光卒次璜又次璜以貢  
需次銓曹女四歐陽宗之彭穰黎思張玉其壻也孫

男九思憲念愨愈愨恕喜忠憲以官生領鄉薦愨愈  
俱邑庠生曾孫男五俱幼侍郎本公季弟之子公初  
未有嗣以屬歐陽夫人子之其事太夫人有順無違  
居閒累年與諸弟日隆色養愉愉左右太夫人心志  
益樂壽益高體益康蓋享年八十而卒嘉靖辛卯三  
且二十六日也其生景泰壬申十月十一日侍郎初  
葬公于其邑松陽之原奉歐陽夫人祔于左以是歲  
十一月初十日奉太夫人祔于右先期具事狀緘書  
授其子憲俾來謁銘欽順與侍郎相知深且有連誼

且恐月  
之誤

有不容辭者謹次其事而系之銘曰  
肅肅矜肇來自闕里從夫而貴復以其子體柔用剛  
式弘內理龍章載錫先昭厥美松陽之原墓木拱  
矣葬于斯合其永寧只

整菴先生存稿卷之十四

明泰和羅欽順允升父著

同郡後學郭一鶚汝薦父 全訂

同邑後學歐陽照文白父

同郡後學歐陽調律伯宣父 全校

同邑後學楊嘉祚邦隆父

真州後學陳夢暘爾旭父 編次

金陵後學沙含玉玉府父

嗣孫珽仕侯符父

璇仕釋白父  
璉仕君長父重梓

行述 一首

墓銘 六首

先吏部府君行述

羅氏系出豫章初祖諱詢宋紹興間來主泰和簿因  
家邑城東北卽今缺城三傳至伯玉府君諱子圭舉  
嘉定解試伯玉二子曰涇甫則族祖庶吉士仲深府  
君之高祖也曰和甫生叔大號大觀始徙邑南鄉上  
模里之西岡大觀生君質君質生元亨元亨是生先

高祖諱以直號直庭富而好禮鄉稱長者配郭氏繼  
劉氏先曾祖諱寧字存謙邑學生芳洲陳先生高第  
未試而卒配曾氏先祖諱鐸景泰庚午鄉試中式授  
黟縣學訓導贈通議大夫南京吏部右侍郎配王氏  
贈淑人生三子二女長子卽家君自幼穎敏有志操  
隨任黟庠潛心問學未嘗出戶庭先祖嘗以陰山木  
風之暫遊卽反丙子還鄉應試三場畢卽赴黟不車  
先祖前數日得疾棄世遂奉先祖母扶柩歸葬己卯  
舉于鄉明年會試禮部中乙榜急於祿養拜青田學

諭便歸為叔父受室昇以家政奉先祖母孀季父少  
姑以行時年甫廿四毅然以師道自任青田科目久  
乏士亦鮮有志者乃擇可進者加勵之謹條範公勸  
懲日坐堂上親為講授夜間至齋房稽其勤惰且有  
茶果粥餌之餽士爭感奮文風一變陳陳王庭相繼  
中選倡修廟學饌堂事見潘太守琴所作記己丑秩  
滿辛卯擢安慶教授先祖母仍就養焉其為教一如  
青田櫛星門蒞于藥局力白于太守且率諸生撤去  
藥局以位櫛星及移學門於櫛星之右求羅一峰先

生記之學字頽敝輒割俸修葺視如家事不屑屑煩  
有司初解舍有妖頗著影響此不為動久之遂熄庠  
生吳本清母喪廬墓縣不為申徑取諸生呈轉達當  
道得蒙旌表丁酉秋闈閩浙交聘往考因試得人為  
盛若司寇林公待用春官鄭公仲璧輩凡若干人是  
年先祖母壽滿六袞事既竣還至中道遂迎以歸會  
姻族稱觴為樂庚子秩滿諸生得雋者柯忠劉溥王  
鸞方向戴恩亦前此所未有也辛丑上吏部考居最  
力辭有司之選壬寅進南京國子學正尋聞先祖母

訃奔歸治喪乙巳復前職戊申考績受勅進階登  
仕郎乙卯秩滿先時已有歸志因不肖欽順初入翰  
林先夫人勸徃一視乃北上六月轉國子助教仍加  
俸一級冬聞先夫人訃遂上疏乞休時年僅六十已  
未受勅封翰林院編修文林郎庚午受誥進封  
中憲大夫通政使司左通政庚辰加封通議大夫南  
京吏部右侍郎是冬感寒疾尋愈逾年患疽久之亦  
瘳癸未四月偶痰氣壅滯至十九日巳時竟不起生  
正統丁巳四月一日戌時享年八十有七家君為人

孝友勤儉嚴毅方正重義輕利壯老一心養先祖母  
二十餘年曲致承順居喪葬祭盡禮痛先祖不逮養  
移其孝於伯叔祖先後迺至宦邸極愛敬焉兩叔兩  
姑婚嫁以時先祖母視成而已撫教季父學成早世  
念之終身先業惟叔父所取仍作樓以居之既倡羣  
從作本房廳事及後堂增祭田以供時祀致政歸復  
作祠堂及廳事以尊祖合族先塋所在一一悉心經  
理宗族媿表待之咸有恩意施不望其報有桀驁者  
率優容之終亦自愧服也兩輯族譜家乘皆錄梓以

垂久遠服食器用雖貴無所加然必整潔夙興夜寐  
罔自暇逸教兩庠升堂伐鼓恒在府縣之先諸生每  
私計之九年無一日曠也以身為教不尚言說一言  
之出聽者莫不敬而信之延及平民亦耻為非禮安  
慶父老皆以為前所未見也既離任往來經過諸生  
奔走候問如常咸依依不忍別有尾行數里瞻望弗  
及而後反者後復白于當道設主名宦祠生祀焉其  
遇諸生恩義兩盡於束修不計其有無貧者非惟不  
受某議婚不能成禮某室敝無以為居某親老而養

不繼某親喪而不能舉且皆有以給之

畧見安慶志及李太守璉

書而鄉士夫之賢而貧者亦間周以義

見劉通府銍書然實

無厚積于時惟先祖母肉食而已敬以事上而不為  
諂非公事不入守令之門在安慶見太守止行揖禮  
而前後守若陳侯雲鶚王侯璠潘侯蕃皆賢雅相禮  
遇會必坐款有文事輒以咨之巡按侶公鍾至舒見  
其立迎曰固常驟試一論乃大加嘆賞曰吾巡浙六  
邑人皆稱汝行檢可謂文與行稱矣侶明年巡浙遂  
有考試官之薦兩任提學若憲副劉公鈺御史戴公



珊婁公謙率優禮焉戴每揚之於泉谷縣學生有不  
率教者輒發詣講下昔書觀禮婁初至進武生十數  
人皆告願人府學婁問潘守彼樂羅教授寬邪潘備  
稱之婁曰吾固知其然也在南雍尤為大司成方石  
謝公所重謝歸休諸生謁文以贈謝得之喜曰吾初  
得先生之為人今又得此文惜不久處盡閱餘稿謝  
後起掌成均為作像贊有維吾南雍實為老成環視  
六館惟先生有聲之語一切世味泊然無所好惟酷  
好觀書然不喜泛濫六經通鑑綱目之外則文章正

宗文選古體韓歐曾文李杜盛唐詩及本朝二三大  
家集而已夙擅文名遇人有求無不樂應南雍務簡  
與同官為文會有所指摘皆自以為中其病也後以  
不肖兄弟迎養又兩至南都及錢塘弔古探竒吟咏  
尤富自丙辰謝事後或家居或就養三子實蕃侍焉  
而李侍于家最久壽朝令且必會媼賓宴款益無歲  
不樂自作慶壽記紀其實以示後人每聞朝庭進  
一善人行一善政輒不勝喜羣姦用事語及恒蹙額  
長嘆李有召命部符且再至卽以大義速其行曰

有以事君吾志樂矣年踰大耋聰明康健金維在躬  
人詫其榮而秉謙執虛未嘗自滿雖後進晚生必與  
為禮人無遠近親疎皆知其為君子長者而推為鄉  
之連尊未病前二月先祖神道碑亭初畢工即從子  
姪肩輿而往周覽畢喜動耆宇曰了吾此念節屆清  
明又欲躬奠祠堂不肖以筋力難強諫至再三乃已  
屬續前三日進茶猶欲自舉請曰甌熱則應曰我自  
知之執虛如執盈蓋臨終無一語之亂將歛則大風  
雷雨竟夕萬瓦如傾鄉人驚訝以為哲人云亾非細

故也計 闈 賜祭仍 命有司營葬域事家君諱  
用俊字舜臣別號粟齋又號西岡退叟配先夫人同  
里曾氏初贈孺人再贈恭人三贈淑人賢明慈孝與  
家君相待如賓先二十九年卒家君終老不忘哀焉  
子男三即不肖兄弟女二長適楊平次適蕭欽蕭氏  
妹亦先卒孫男五琰瑄瑤珥瑤俱邑庠生珣國  
子生女五長適萬安庠生剡宏次適楊泰餘尚幼曾  
孫男四偁偁儆份女一所著有芝田皖城南雍寓京  
歸田請稿論語有類編葬卜後二年乙酉正月庚申

墓在邑樟橋里天柱岡之陽先夫人同兆云

亡弟前都察院左副都御史允恕墓誌銘

允恕余季弟也諱欽忠初號敬軒更號西野晚樂金魚洲之勝作惺翁亭其上士友亦或以惺翁稱之生成化丙申三月十九日年二十預江西舉送遭母夫人喪未行弘治己未中禮部試列名第八廷試第二甲第三人賜進士出身三榜皆與仲兄允迪聯名庚申春授刑部福建司主事其秋遂移疾歸壬戌秋奉先吏部公赴杭以允迪在運司迎養故其冬還朝

改禮部精膳司正德丙寅陞署主客員外郎事明年春選陞通政使司右叅議三遷至左通政滿考推恩封先公如其官贈先母恭人壬申冬請告歸省癸酉陞南京太僕卿會疾作辭明年陞通政使行未及上而言者劾其曠職吏部得旨將改用之力引疾求退竟得請既而有司以病痊奏請起用不報嘉靖壬午始復除通政使添註管事辭不允會遭先公之喪及再被旨人朝供職則丁亥春也允恕舊有血疾變為積塊供職未幾疾屢作頗妨朝夕遂連奏乞

年恕午即元年也

休 上矜念之特改都察院左副都御史 賜璽書  
俾總督南京糧儲視事僅決旬復以通政使召辭疏  
亟上召命加嚴己丑春力疾啓行且再辭行至邳州  
奉冠帶聞任之 命抵家輒就牀褥疾日益甚更數  
醫竟不可為矣前卒數夕強起正襟危坐舉手向余  
首屬為銘已而從容百十言皆臣子大節且言事君  
之義敢有不盡但自覺光景已促無可奈何凡宜為  
我表白此心死無憾矣遂語及葬地顧諸姪歷示其  
向背曲折令善為之乃復舉手向余曰夜向深凡宜

借  
就寢弟亦倦矣明當更盡所言然自後恐重傷余懷  
時有所付囑惟授諸子姪而已語皆精審如平日初  
允恕來告行余嘗酌之酒酒半頗嘅叙其平生謂異  
日凡當銘我有志未就而卒此言幸勿忘也余笑曰  
安有是然心竊恠之及疾甚余借允迪往省其宵輒  
感異夢或示余易義有戊與癸合之文卒之日則八  
月二十五日戊子也嗚呼孰非前定邪惜未徵其所  
自覺者何也享年五十有四吾羅氏初祖諱詢當宋  
紹興間自豫章來主泰和簿遂留家邑城東北隅今

所稱缺城是也八世祖號大觀始徙居上模里之西  
岡世遠族蕃居止頗隘允恕欲還居缺城未果乃市  
地學宮之傍築室而居之高祖號直庭富而好禮鄉  
稱長者曾祖諱寧從芳洲陳公受書游邑庠早卒祖  
諱鐸縣訓導贈南京吏部右侍郎考諱用俊國子  
助教致仕累封官與祖同祖妣王氏妣曾氏俱贈淑  
人配蕭氏封恭人子一珏女四長許嫁曾教諭之子  
民章餘皆幼側室丁氏王氏吳氏珏王出也允恕生  
質厚重自幼不凡年十四五即有志向上聞父兄前

輩語及聖賢可學輒踴躍思奮若不能自己者舉業  
外恒別有用心處家庭相聚於學益無所不講若心  
性理氣諸說講之尤詳始或異同終其所見皆合性  
剛負氣然於親賢取友每深自謙抑惟善是從一時  
名士往往樂與之交晚於湛甘泉尤善也為文工造  
語簡潔圓勁惟意所向善變而不窮而必歸宿於理  
詩古近體多清婉有餘韻頗造古作者矜城方將會  
萃其稿以俟知言者擇之事二親愉色小心恒若不  
及奉養之具雖微未必躬視之余與允迪性各有偏

未嘗不婉致其樂也厚於宗族嘗別儲粟以周其乏  
臨終慮其不繼復益之千石屬講求歛散法以圖經  
久居官奉職綜理精敏尤善奏對廷中推為第一嘗  
一充廷試讀卷官雖久從家食然於天下事皆嘗留  
意逢時再出亦將有以自見矣顧阨於多病而年復  
不永可勝惜哉以卒之年十二月甲申葬邑東門外  
金魚洲上首寅趾申皆從其治命並營二窆虛其右  
以俟蕭云嗚呼余衰鈍不文然所以銘吾弟者惟其  
信而已矣文不文不計也嗚呼銘曰

生必有知孰為之制近止尋常遠通百世知之所逮  
皆欲行之其近其遠抑有攸司進非子能實惟知退  
有赫其臨有嚴其對歛其精英還之彼蒼隨帝周流  
其或不亡

郭處士配羅孺人墓誌銘

孺人姓羅氏先祖考贈侍郎府君之季女也母王氏  
贈淑人景泰乙亥十月二十六日孺人生于徽之黟  
庠官舍故其諱曰徽娘踰年而府君卒後四年先考  
封侍郎府君筮仕得青田教諭奉王淑人往就養孺

人隨之。成化庚寅先封君滿考過家遂歸孺人于同鄉竹溪郭氏為處士善仁君之配。孺人性專靜寡言笑自幼奉母訓惟謹及為婦能竭力以事舅姑烹飪調脯污澣補綴率身親之不以付婢使姑老而患風痺左右扶護者十年未嘗有惰容事後姑亦能得其歡悅處士雅克振奮孺人相之甚有方治女工常至夜分大布之夜非甚弊不易日積歲累貨用益饒用過從散甘酒旨不戒而具尤篤于教子奉師之禮每

田新棟字以成處士君之志春秋薦享賓客每從厚待羣從子姪皆有恩有與處士不相能者遇事輒相持不置孺人恒委曲小心以彌縫其隙卒歸于和孺人體貌清癯然素少疾疾中年嘗苦目眩恪守禁忌俄而遂愈晚以勤家之故乃日就衰憊一旦呼諸子語之曰死生有命吾度不能起汝兄弟其善事汝父務相與雍睦勤耕讀以圖光大家門吾死無憾矣翼日遂卒嘉靖癸未二月二十日也享年六十有九子男四長淳龍南縣學生屢試秋闈未遇次景直先卒次景文景賢女二長適平原曾僉憲嗣子紱

次適上模曾國教諸孫齊孺男十三某某女二處士  
卜以是年十月庚申葬孺人于其里曾家山之原先  
期命淳具事狀來以墓銘見屬嗚呼自吾姑謝世而  
吾父同氣之親無復存者矣永念平生友于之愛不  
知涕泗之交集也未踰兩月吾父又棄諸孤積憂薰  
心百慮昏塞尚安能執筆以銘孺人之墓邪葬事且  
嚴處士君竟不余釋乃勉強敘而銘之銘曰  
孝敬儉勤慈惠溫良宜家之本婦德之常彼驕彼哲  
慈謂非祥不覩梟鴟疇辨鸞鳳孺人逝矣遺馥彌芳

亦有賢子尚觀顯揚

亡妹蕭氏婦墓誌銘

亡妹諱考珠姓羅氏以成化己丑六月七日生於浙  
東青田之官舍家君時為其邑教諭適九載當考績  
故因以考名之稍長先母曾夫人親教之女事習之  
旬月輒可觀其工多而用省者稍鮮即己性沉密寡  
言笑而遇事優為先夫人每有所指使動皆如意以  
故尤奇愛之年十五嫁為同邑蕭欽時孀妻時孀先  
君憲副公與家君同領鄉書故因而締好吾妹出入



貴富一以勤儉自將相時肅治家斟酌淺深度量緩急不動聲氣而條理斬斬時肅常曰吾家之成吾妻之力也憲副公嘗便道還鄉良賤聚食累于指且賓客皆至吾妹介婦也適以次當家隨分應酬未嘗有失恒痛先夫人早世於家君動靜必謹候之樓獻時物以助甘旨既連失數子即以時替時肅置妾久之復無所出由是恒鬱鬱不自釋曰如身後何余每從容寬譬之輒應曰諾然未出戶已聞嘆息之聲竟以此成疾卒正德乙亥六月十五日年止四十有七嗚

呼痛哉後數月時肅書來以葬期告遂請為銘夫其賢而不壽且無子余所為甚哀之者也將為之計久遠銘其忍無作乎吾妹有二女長適南富王煦次適清溪楊袞皆同邑葬以卒之年某月某日墓在千秋鄉江東里某山之原余往時嘗一至其處為時肅言可為陰宅者也銘曰

凡人之情皆願有子命之方正有無定矣妹也賢明獨蔽於此我銘其藏究極終始後千百年誰其忍毀

亾女劉氏婦墓誌銘

慰

嘉靖甲申春余婿劉宏以女氏之疾來告亟令人往  
候之疾且進其二弟又迭往候之五月十六日竟不  
起年止三十有八嗚呼痛哉將以是年某月某日葬  
其邑某都田心之原宏來請銘銘蓋有不忍為顧不  
可無一言以慰吾女於地下乃追憶其平生誌而銘  
之吾女以成化丁未八月二十五日生名之曰任潔  
稍長其母攜之從余於官所即能領教戒嗜女紅間  
佐其母治庖饋已而業役在手居止有常處未嘗輒  
窺外戶於服飾不求華美雖屢經修補亦自安之余

借

心重其賢為之相攸屢矣最後乃有薦宏者稱其秀  
穎好學受知其邑大夫黃德裕特進補弟子員余察  
之信女時年十九遂以歸焉劉世居萬安之橫街為  
衣纓鉅族吾女既習聞婦道承上接下無所不致其  
謹舅姑悅之居五六年流賊破其邑焚其居宏先已  
挈家避之江上適余復起莅南雍遂以婿女借行館  
之再期宏請還修子婦之職乃辭去吾女初嫁資裝  
殊弗備及是亦未能有所增益察其意無不悅者宏  
既抵家其父介菴君以口衆事煩析產授諸子宏方

力學圖進取一切內事皆吾女任之自此凡其卒十  
餘年間凡宏之親師取友所以資給之者既無或缺  
而田園加闢棟宇復完吾女之約身勤家於此亦可  
見矣生子皆不育有女二人長者年十三幼者六歲  
女之族姓曰泰和缺城羅氏今所居里曰西岡大父  
號栗齋國子助教致仕封南京吏部右侍郎大母曾  
氏贈淑人余其父也號整菴母曾氏亦贈淑人銘曰  
女事之習其心孔專迨其有家黽勉相先勞則多有  
而不承年無忝所生銘以是鑄

恩例冠帶西磐曾公墓誌銘

嘉靖庚寅春正月外舅西磐公有疾欵順往問之就  
牀坐語甚款意氣淳淳如平日以酒饌進徧嘗之已  
乃握手言曰吾疾殆不起卽不起宜以時葬勿效時  
俗所為第為我書其平生納諸壙中吾無憾矣余拱  
而對曰謹奉命旬日後公出就西齋宴息勢若小愈  
二月十六日朝食罷覺微噎就卧少頃則恬然逝矣  
余走哭于牀遂視棺歛時其伯子明揚官于廣乃與  
其仲明瑞謀殯公于正寢之後堂以俟禮也明揚歸

泰

卜葬日得是年十二月二十八日甲申欽順乃以公  
治命為誌公諱顥字之恭別號西磐姓曾氏世居恭  
和上模里為望族曾祖諱楚芳祖諱季倫父諱衝字  
士舉前母羅氏余從祖姑繼母後塘羅氏母南舍郭  
氏以正統乙丑二月十三日生時舉翁年幾五十矣  
得子晚頃刻不令去左右教愛甚周公生質清臞或  
頗疑其難育惟西平胡處士仲溫甫一見竒之許妻  
以女後卒歸公是為外姑胡孺人也稍長從師讀書  
學五七言詩皆略解顧舉翁年已老乃一意服勞學

辨

以中輟性闔爽樂易事伯叔諸父與羣從兄弟處皆  
能得其歡心遇人無小大戚疏一見皆如舊識綜理  
家務及供事邑庭動皆整辨鄉人莫不嘆羨謂舉翁  
有賢子矣翁既逝公益挺挺自植族綱之振宜力尤  
多嘗慮房族間有不率教者符走會府以族兄刑侍  
公故所立家範白於憲司願得舉行以保其族憲使  
陸公大悅下其詞郡邑俾符公如所謂公益嚴諸身  
以為之率進二三賢子弟以為之輔小懲大戒而恣  
肆者鮮矣舉翁嘗率羣從建祠堂以事先公復與諸

有力者增置祭田時祭益備廷師教子常厚為禮待  
賓客一無所忽性不飲酒然公但在席即無不樂者  
有時興至或高歌一曲音韻清遠聽者皆為之灑然  
余初入翰林公為挈家以來留浹歲及佐南雍復走  
使奉迎至則為留再歲兩京之勝皆徧覽之士夫多  
以詩文贈其歸往往能道其實嘗得別墅去所居之  
西僅里許竹樹深茂意甚樂之因以西磐自號又別  
治花塢出門百步而近名以藏春其晚年蓋無日不  
在塢中也邑大夫聞其賢嘗禮致鄉飲辭不赴及年

人十遇 覃恩詔下遂拜冠帶及絹綿米肉之賜  
賀客駢集醕酢雍容衆莫不榮其遭而美其稱也胡  
孺人先公二十八年卒所生女一人最長是為余室  
封孺人卒贈淑人子一人即明揚博羅河泊所官貳  
室劉氏子一人即明瑞邑庠生孫男三人曰都曰鄒  
曰郊曾孫男四人朝著朝彥朝譜朝瞻初公葬其考  
於里中嶺昔之原既老遂營壽藏于其側今啓而葬  
焉墓門北向因其山勢然爾銘曰  
惟西有磐碩人之寬貞于歲寒五福斯完葬從其先

既固永安匪辭曷傳堅珉是鑽

處士楊君墓誌銘

君楊氏諱平字顛正別號勿齋余女兄之夫也年五十有二正德己巳五月庚申以疾卒親交厚者皆赴哭盡哀而余哀之念之至於久而不能置蓋不獨以其親也自余獲從君游于今二十餘年矣雖狎見未嘗不相先以禮相匡相翼一出於誠心而驩然無間其不相見遇有事輒交通手畢君所貽或片紙數語莫不粲然成文家君嘗稱其簡當可喜其風儀秀整

畢  
忍  
筆

性軒豁善辭辯從容往復衮衮數十百言不可窮然余說或長亦未始不欣然服也先夫人大故余在朝二弟荒迷莫知所措殞殮一出君手極其周慎家君致政里居君時時來省遇生日必清晨攜酒敬至歲以為常不爽時刻余兄弟相繼登仕辱君贊喜者數矣而未嘗少以非義見干蓋其識明而氣豪審於大體而所向者恒近正然也嗚呼余閱人亦多矣求如君者蓋少而况肺腑之親乎此余所以不能忘情於君也君幼學記誦兼人年十六受室其父方游邑校

價  
圖進取卽舉家政授之君不得辭學因以中廢然治  
家極有條理常以其間涉獵書史旁及陰陽醫卜之  
說皆頗通其大義事父母善承順弟奉亦有才智事  
多與之謀內協宗親外交納名人賢士施張磊落聲  
擯聳一時富有餘財然一錢不妄用卽當用雖空橐  
無難色揚氏居泰和世久其源流有太師文貞公所  
作譜在自君六世祖始遷高隴其諸父又分居綿溪  
君曾祖彥實以輸粟被旌為義民祖敏恭別號不侮  
父光衍未仕而卒母歐陽氏初室蕭氏贛掄大尹時

習之女繼室是為家君國子助教封翰林編修之女  
於余為兄側室劉氏蕭氏諸室皆無子先已立弟子  
忝為嗣女三繼室出者歸尹貫劉出歸陳儋蕭出許  
歸曾氏子綱初余往省君疾君首以葬地託余為相  
得航溪里南木岡寨下之原吉比疾甚余再往省則  
遂託余後事第姑應之嗚呼豈謂遽成永訣邪君卒  
後十有一旬有一日其從子穩卽余所相地斂甕並  
甕二壙越七日戊午壙成奉君之柩葬其左虛其右  
以俟君繼室余於是再往視窆且為銘刻石納壙中

以寄余情以終君之託云銘曰  
才足以達其志氣足以充其智年則不償其有而從  
子為之嗣嗚呼奈何其永寧於是

整菴先生存稿卷之十五

明泰和羅欽順允升父著

同郡後學郭一鶚汝薦父

全訂

同邑後學歐陽照文白父

同郡後學歐陽調律伯宣父

全校

同邑後學楊嘉祚邦隆父

真州後學陳夢賜爾旭父

編次

金陵後學沙含玉玉府父

嗣孫珽仕侯符父



琬仕穉白父  
璲仕君長父重梓

祭文 三十首

祭澄江先生尹文和公文 同郡舉

嗚呼學之博矣或短于辭惟公通敏當代攸推文章  
事業兩得云稀經濟大略公復有之雄聲偉望清秩  
崇資遭逢 憲廟尤被簡知孰工為問官屢外移卒  
登黃閣參預政機 王言以大國是以熙 元良是  
保朝著是儀 重明繼照彼此一時奉身而退鄉有

山壤

衮衣江山之勝可遊可嬉著述之富愈出愈奇踰八  
望九一疾不支訃音上達 當宁齋咨謚從 中錫  
葬則有司公乎奚憾不朽在茲顧惟某等嘗辱提撕  
由頽梁壤何仰何依萬哀一奠有淚連渙澄江明月  
悠悠我思嗚呼哀哉

祭三江先生毛文簡公文 丙戌春

嘉靖更化朝多老成一其心力以迓休明公作春卿  
首嚴邦禮既飭既周神人具喜心勞身病夢繞南雲  
里門未入凶訃遽聞嗚呼哀哉學博而醇文清而婉

德厚才充識精慮遠賢科首選謙約自持居無妄動  
進必循資甫陟桂坊孰甘余沮竟長詞林孰非吾與  
經筵陳說亶亶其恭文場校閱濯濯其公乃佐銓曹  
遂聯八座多事之秋有聲無過驅馳萬里捧日而  
升化成可待壽顧弗增嗚呼哀哉議禮之難古今所  
病猶幸殘經頗存明證品節有稽民志斯定公之忠  
勤於斯為盛懋官懋賞恩則非私病妨朝謁位許  
暫辭錫之溫詔春浹肝脾預期平復來覲勿遲公  
竟不來皇心孔盡官豈不高用其未極易名孔令

卹典載申光昭青史一代全人欽順無能辱公同榜  
過賴公消善資公長星霜屢易乖隔恒多尺書往復  
不廢琢磨爰及晚年幸同史事筆削方殷去留復異  
從茲一別再見無期朔風承計有涕連渙頃值家艱  
荒迷失度薄奠寫忱後時為負嗚呼哀哉

祭楓山先生章公文 丙戌春

地  
嗚呼天高日朗公之襟懷旭負海含公之問學德容  
之溫潤則甘雨和風氣象之尊嚴則泰山喬嶽萃精  
誠於月窟天根悟至理於鳶飛魚躍亶亶焉無時不

勤休休焉無日不樂此欽順之於公蓋未易極其形容而粗能道其大略者也公之發身則聽歌鹿鳴省元甲榜吉士輩聲公之歷官則翰林編纂評刑僉臬司成六館然而滿考之書恒少居閒之日甚長惟公論之交附肆屢騰於薦章朝廷方急於用賢由司成三遷而正位宗伯公尤篤於自信自南雍一退而終老故鄉此欽順之於公蓋未易詳其本末而粗能道其行藏者也藻思雄文忠言讜論折獄惟明誨人靡吝何王金許上邈程朱正傳斯在之矣弗渝其所

未為付之猶子出入門牆矧多良士謂公宜壽千百為期云何一旦失此人師欽順初涉仕途公方高卧竟以非才忝為公佐夕矣晨熏膏枯起惜巨海纖鱗欣然自賀研窮性命商略古今何遠何近何淺何深奉違彌久懷仰無任屢憑過客貽我好音聞訃南銓亟圖遣奠家問驚心弗果如願奄罹大故孤露漑漑迄茲累歲徒抱微誠墓道春風青回宿草翼翼新祠栢題蘭棹敬遣頑兒祇薦蘋藻短誄無文中忱是倒

嗚呼下  
疑脫哀哉

嗚呼

祭大司徒吳公憲之文

嗚呼才不虛生名不苟得必有勲勞効于邦國承流  
宣化激濁揚清兼資文武濟以忠貞四十年間如公  
有幾君子所資小民所倚我皇勉勉方切圖終人  
羅求舊公遽罹凶天實生公著名亦早胡不少延為  
傳為保嗚呼哀哉臯臯嘗嘗其玷莫知清共在位公  
則有之赫赫炎炎其燄可畏寵辱不驚公其無愧高  
冠初掛三徑已成論文尊酒樂我良朋伴真優游疾  
綿壽祉曾是哲人七旬而止嗚呼哀哉蓋棺論定好

惟傳

惡疇私銘幽揭顯不朽在茲丹旒翩翩行就窀穸曷  
寫哀悰辭香束帛交游之痛邦國之悲昭明如在歆  
此一卮嗚呼哀哉

祭大司馬王陽明先生文 戊子冬兄弟同舉

惟公才周萬務學本一心氣蓋古今量包湖海紹斯  
文之隆緒躋斯世於平康豈惟衆所同期誠亦公之  
自任遭逢昌運服在大僚屬時望之方隆胡仙遊之  
遽爾固有光於建立曾未究夫經綸偉矣希文天章  
遼邈勞哉諸葛渭曲淒涼愚也弟兄夙欽風義交游

以世氣味攸同宦邸論文不在盈尊之酒歸途講學  
猶存隔歲之書約信頓乖盡傷何已素幃伊邇薄奠  
斯陳有烟精靈鑒此誠意嗚呼哀哉

祭都憲金公德潤文

嗚呼一第為階百年良遠何以克終其惟勉勉公由  
鄉校起擢魏科即曹精彩如鏡初磨乃職旬宣于川  
于廣于贛從金閩楚交響瘦姦隱慝公鑒惟明深山  
長谷公令惟行莫祥匪刑莫惠匪政凋瘵以蘇反側  
胥定通才宏量勤力小心何燥何濕何淺何深玄髮

欲斑外庸斯訖旋軫留都式均勞佚乃佐邦政乃長  
憲臺不徐不亟蔭蓋陽開有周其防無罅不補遭彼  
權姦莫予敢侮功成身退壽考令終全人之目交口  
屬公訃徹九重載履郵典由綸如緋俾幽作顯靈  
輒將駕素服盈庭齋咨涕淚豈獨親朋亦有辦香來  
自千里報德酌知以後為恥吾儕宿成莫此一觴斯  
文之好何日而忘嗚呼哀哉

祭都憲歐陽公子相文

惟公稟質壞竒抱才卓犖行事近乎中庸處心一於

誠確鄉榜榮登甲科繼擢由宰花封春勻萬夢晉陟  
烏臺秋高一鶚祗膺副憲之遷躬提列郡之學既樂  
育夫英材亦兼療乎民瘼方面正員載光簡擢荆以  
時清政以時擴尹京府而令聞沛然佐都臺而清風  
凜若宜享遐齡永儋高爵胡一疾之偶需竟彌留而  
不作氣之當盡者既還付於山川用之未窮者終虛  
委於真漠此上下之情所以無不盡傷而吾人之淚  
於焉為之迸落也丹旆悠揚長江空闊歸葬故山復  
為完樸某等好素敦於同鄉禮宜薦乎清酌痛方甚

而詞莫宣情有加而儀則薄嗚呼哀哉

祭常少劉務教先生文

惟靈天資醇樸心地坦夷為石潭之孫而克繩其武  
為文安之子而善為之箕中舍承 恩光增東洛符  
臺進秩名著南畿既兼工於詞翰亦克謹於操持遭  
權奸之亂純甘廢黜而不辭陰霾既廓舊物重縻爰  
被清卿之擢厥惟顯相之宜俄嬰末疾乃宿名醫方  
屢更而藥罔效疏朝上而舟夕移行金緋於清晝觀  
桑梓如平時小愈之歡謹治長終之慘適罹計音遠

徹孰不興悲欽順分聯伯仲韻協填笈尚擬重遊之  
有日寧知再見之無期遙陳薄奠以寫我思公乎如  
在庶克鑒茲嗚呼哀哉

祭太平知府王公文

嗚呼世祿之家鮮克由禮自古雖然豈無卓爾惟公  
先世太守尚書公少而貴晚亦分符百有餘年有祿  
有位公視如無溫恭靜退出言舉足循矩應規若無  
不可而有不為三載遐邦令行禁止食之誨之大小  
咸喜庶幾黃髮以究厥施天子何意曾不勅遣歸葬

勅當  
作愁

茲山其寧惟久生死交情久雞絮酒嗚呼哀哉

祭封編修陳公文

嗚呼鄉有老成一鄉之望儀刑所存奈何凋喪公以  
子貴惟德稱之出言不苟持行靡虧命服在躬聲華  
有燁會訂耆英養隆甘旨高年盛福以引以增後生  
小子是仰是承子秩再遷握章南院庶公一來式燕  
且行安車未動凶訃遽聞愁雲黯黯落葉紛紛凡在  
官曹孰非僚友惻愴同情遙奠杯酒嗚呼哀哉

祭王宜學編修文

衍

惟仁與義人道大端有生均稟去之寔繁所貴吾儒  
真知允蹈為臣必忠為子必孝時雖多變我則有常  
不幸而死其道彌光君世高明資稟尤粹學匪詞章  
務求諸內一官翰苑再犯逆鱗甫離災瘴竟殞其身  
新化方流天子明聖彼獨何人構茲禍阱是非榮  
辱苟快目前百世之下容有聖賢旅襯來歸江山慘  
淡求仁得仁君亦美憾斯文之好遠大之期嗚呼已  
矣曷寫余悲

祭蕭君愚憲副文 戊子冬

甲子之秋鄉升秀士我之識君茲惟其始出入兩京  
過從二紀我之知君詞章政理間辱詩箋率單底裏  
我之懷君室遠人邇權任方隆生涯遽已我之悼君  
胡能自弭身後清名洋洋盈耳有永其聞克旋其里  
予以疾妨辭由誠累寓敬一觴靈其鑒只

祭告江湖之神文

大江之神 鄱陽湖之神 章江之神 欽順不幸  
喪妻封孺人曾氏又喪介婦張氏茲遣兒子珣扶送  
二柩由上新河發舟歸于泰和以圖安葬江湖浩渺



厥有攸司謹以剛鬣柔毛果敬清酌用伸虔告神其  
保佑俾人情胥協風波不驚登岸如期副此惓切則  
存沒皆受明賜謹告

祭舅氏舅翁文

五月十九日

次  
嗚呼吾母兄弟坎長惟公孝友直諒古人之風公在  
初年讀書幹蠱出取束修入奉慈母家口數十視猶  
一身飲食衣服莫或不均亞卿公族也有言汝家良睦  
彼富彼豪視之有惡曾惟大族禮正吉山須公裁酌  
以適于中公于晚年頗厭紛擾後子前孫朝園暮沼

眺

龍坡春暖杖屨出遊登高眺遠其樂油油老父家居  
門牆密邇時枉過從談笑移晷吾母先逝幸公以存  
庶同老父頻對清樽將謂昊天俯從斯願孰意今茲  
奪公壽算嗚呼哀哉欽順無似早辱稱奇鄉科之捷  
耀以大旗逮佐南雍特屢枉視目擊清貧口贊心喜  
雖無旨酒亦暫淹留平安之報別後屢收頃乞侍親  
來歸故里見公康彊欣慰無比茲逢新歲總服任躬  
拜公弗克公遽考終嗚呼哀哉考公平生諒無可訾  
沒世有稱訂于君子衣衾既備棺斂孔時哀號悲泣

莫匪親知龜吉辰良祔于先祖水繞山環有龍有虎  
公歸奚憾生者徒傷少停風馭歎此一觴嗚呼哀哉

祭叔父守菴府君文

嗚呼惟我叔父一紀而孤我父惟兄是挈是扶是率  
是模以成厥德是度是諏以修厥職先祖宦業吾父  
是承居家而理叔父之能惇本鄉方朝耕暮讀為所  
當為惟日不足公私兼濟門戶以光肆其餘力亦善  
詞章隣閭我平族謀我定克厭羣心亶惟忠信帝嘉  
我父早賜歸田荐封四品式介高年鴈序載聯華髮

相映子姓振振莫不承令春風秋月菊榭蘭階從容  
杯酒和樂無涯大耋之榮方為凡喜如何一疾竟頽  
不起嗚呼痛哉憂勤惕厲靡間初終生平所獲有吉  
無凶名以德延謀以孫遠壽考令終旁稽亦鮮顧惟  
鄉族重失老成咨嗟悼嘆有識同聲嗚呼哀哉欽順  
越自成童粗知學習仰賴提撕爰忝科級間從家食  
興滿竹林迺于官邸亦辱來臨拜別嘉禾壬申之夏  
夢想音容總如隔夜思侷長育報乏絲毫遽承凶問  
惟有悲號斂莫效誠葬莫供役悠悠蒼天此恨何極

一觴之奠其敢忘寬哀纏毫素辭達為難嗚呼痛哉

祭外舅西磐壽官文

中元追遠時俗所同思翁不見有惻其衷翁殞在堂  
神遊何許祗奠一觴泣涕如雨嗚呼哀哉尚饗

又

惟公德重于鄉壽幾于菴子姓振振率遵彝教東塢  
藏春西磐寄傲取樂能多其神不耗乘化飄然如夢  
斯覺諸福寔全幾人能到惟予小子好自髫年迂愚  
靡及愛助惓惓迨茲退處頻待芳筵餘歡未洽永訣

侍

鳴

何遄靈輶既飭于彼新阡寓誠薄奠有淚如泉嗚呼  
哀哉尚饗

祭季弟允恕都憲文

嗚呼死生修短吾不復疑廢興得喪諒匪人為若吾  
弟之善始令終其亦可以無憾矣吾又何為哭之不  
足而繼之以辭邪蓋英才之挺出恒千一以為期其  
陶冶於陰陽者既精醇之間值而玉成於君父者亦  
甘苦之兼滋歷歲年其既久殆左右之咸宜冀仰酬  
於大造必有補於當時撫流光而自惜晞前哲以高

光

馳曾此志之未就忍何心而弗悲嗚呼天人之際誠有未易言者矣古今之跡豈無歷覽而周知者乎所以淚滿英雄之襟益不獨孔明渭曲之師而已嗚呼痛哉甲申之吉爰契我龜玄堂深穩允協成規君行靡顧我者安資舉觴為別能不遲遲嗚呼哀哉尚饗

又小祥祭文

吾弟云亾余襟猶濕誰謂茲辰小祥奄及四方上下魂氣何之百憂余感知乎不知賓厲再來桂華仍吐子獨何為一去終古情深骨肉矧曰奇才長編斷簡

觸目興哀物理固然如何則可歎此一觴庶其慰我嗚呼哀哉

祭劉氏女文 甲申五月二十日

父子之愛天下所同而吾愛之所鍾乃若稍偏於汝者數年不見念之無已忽聞遘疾心甚憂之然以汝孝敬誠莊克修婦道宜為鬼神之所鑒佑冀必臻勿藥之喜以遂歸寧之願也豈期日後日月復月纏綿半載竟至此極遂成千古之長別邪天乎痛哉荼毒盈懷言莫能盡特令汝弟往奠一觴汝其有知歎我

至意嗚呼哀哉

劉氏女周年祭文 乙酉五月

徒  
汝生在室凡十九年嬪于劉氏其數亦然命既弗長  
子復短折宗姻之論徒徙惜其賢昔人有言吉凶不僭  
今既無徵於汝又安所取信於天耶倏再逢於諱日  
驚歲月之易遷貞姿懿質永閟重泉惟見外孫女二  
人婉孌於吾前而已嗚呼痛哉酒以薦芳詞以達意  
一氣感通無遠弗至尚饗

祭劉壻咸宏文 戊子秋

共

陰陽迭運五行交錯萬變不齊其機疇握求之弗獲  
惟曰自然莫致而至命也何言子之秀明識于初冠  
甥館得人良適我願往來二紀匪直情親論文講學  
所敬日新行已端莊姓尤耿介孝友之稱孚于內外  
徐驅遠到衆所共期云胡中道倏與世辭嗚呼哀哉  
疾之初萌微覺中燥懼胎我憂諱弗以告徵於面貌  
始克知之百方醫療則已後時三歲孤兒八旬老母  
永訣丁寧載甘載苦手書囑我一札十行披讀未竟  
淚下浪浪嗚呼哀哉玄室既營靈輒既飾視迄未由

重我心惻平生所學觀象玩辭死生修短亦復何疑  
送往撫行兩尺一體慰子于冥庶其在此有敬維旅  
有酒盈觴靈兮不昧來格來嘗嗚呼哀哉

祭告故嬪曾淑人文

茲者柩已登舟安置妥貼時維冬半江湖水平晝多  
北風舟行良便兒子珣不離左右季弟復得告偕行  
早晚之間家庭無異吾妻魂靈其無恐無懼安歸故  
鄉以就窀穸一杯奠告尚克鑒知謹告

祭黔國公夫人樊氏文

惟靈柔姿懿質毓粹含貞姆前保後不庸而成親則  
帝甥芳傳椒殿容德既閑蠶繅亦善明哉都尉式謹  
相攸莫如黔樂豈必中州萬里于行上公是配蘋藻  
宵陳參殷夙退篤生主器光紹前聞月行幾望桃實  
向蕢音樂在房亦惟靜好曾是委佗而不偕老痛深  
骨肉有淚如澗喪車還葬卹典宜膺牛首戔戔玉顏  
永閟莫此一觴縉紳之誼嗚呼哀哉

祭楊淑人陳氏文

月湖先生  
楊公之配

惟靈德門鍾美姆教時申祗循內則以慎其身清吏

鳴

之支豐城之望爰得所歸其車百兩姑嫜允顯位號  
斯崇孝隆于始禮奉其終庸庸良人聖賢是企克配  
無違柔嘉而理欽于賓祀惠此宗姻執麻服澣居貴  
猶貧樛木垂陰芝蘭滿室撫愛之勤一如已出豈云  
徒愛尤篤教之乃其文行莫可瑕疵攜赴鄉科庶幾  
聯擢胡不少湏遽歸冥漠相夫之效錫命已蒙夙勤  
丸膽未覩攀龍嗚呼哀哉欽順等辱在同鄉飲聞德  
操儀鳳在瞻失鳳是悼風帆南移萬莫一觴慰存悲  
逝詞短意長嗚呼哀哉

遷葬顯妣夫人告文

維嘉靖三年歲次甲申十二月辛卯朔越二十六日  
丙辰孝子欽順等敢昭告于顯妣贈淑人曾氏之  
墓男等卜以明年正月元日奉葬 凶父封侍郎府  
君子四十一都天柱岡之陽牛了塘之上惟吾 顯  
妣禮當合葬謹卜明日丁巳之吉風啓玄堂虔奉遺  
魄俯就新棺至日與 凶父靈柩同行往即永安之  
地伏惟鑒知

謁族高祖樂志府君墓告文

維嘉靖六年歲次丁亥正月己卯朔越八日丙戌族  
孫南京吏部尚書欽順敬謁 族高祖考樂志府君  
高祖妣王氏孺人合葬之墓再拜而言曰 府君去  
世垂八十年德積厥躬慶延于後子孫蕃盛咸篤孝  
思改曆從宜獲茲吉壤山川盤互永永其安慨想明  
靈不忘佑啓詩書科第尚克有承瞻仰塋封良深慰  
感特牲清酌惟以薦誠謹告

祭告始遷西岡祖大觀府君請神主入新祠文  
頃年改作祠堂幸底完美乃涓吉日用妥 明靈位

正厥中禮從其舊 質堂府君位下子孫神主序列  
于左 章山府君位下子孫神主序列于右謹以牲  
醴用伸虔告 靈其隆鑒是止是綏祐我後人永永  
無斁

祭告三代考妣請神主入小宗祠堂文俱已丑十一月  
頃作小宗祠堂幸底完美式遵 國典以妥 明靈  
茲奉 顯曾祖考妣神主入居右第一室 顯祖考  
妣神主入居左第二室 顯考妣神主入居右第二  
室 亡叔凱風秀才神主附于左序 故嬪贈淑人




曾氏 亡婦張氏 姪婦曾氏神主祠于右序謹以  
牲醴用伸虔告 靈其降鑿是止是綏祐我後人永  
永無斁

新居落成祭告先考妣文 丙戌冬

北  
仰蒙 垂裕克遂詒謀惟此一區舊為重屋癸未之  
夏吾 父實考終于斯其年仲冬爰始改作堂寢相  
次傍翼以樓比及今茲工役方畢永惟吾 母存日  
已開厥基吾 父晚年復形諸夢時如有待事匪偶  
然今擬名前堂曰有闡中堂曰思永後堂曰拱此式

昭夢卜之祥仍寓箴規之意率遵遺訓罔敢自專謹  
以剛鬣柔毛清酌庶差用伸虔告 英靈如在惠我  
無疆



整菴先生存稿卷之十五終

命謹校

丙辰孟陬塾生大郷良則奉

